



La preson e je tantis robis ma, plui di dut, monotonie.

Dut al è za fissât. Di cuant che si sveisi a cuant che si va a durmî, dut al è regolât di oraris e di proceduris decidudis di cualchidun altri. Sul imprim un si inzegne par rompi cheste monotonie, par restâ vîf, ma ae lungje ancje i plui dûrs si usin. Cumò che o soi fûr, dopo vincj agns di galere, mi sint come tun paîs forest là che lis personis a van daûr di regulis diviersis e a fevelin une altre lenghe.

Intant che o jeri dentri, il mont al è lât indenant. I amîs e i compagns a son lâts indenant. Tancj di lôr si son slontanâts e chei altris si son fats la lôr vite. A fevelin di famee, di lavôr, di timp libar. Ducj concets che par me a son diventâts forescj. Tai lôr voi o lei il dûl, la fature di capî e il solêf parcè che a san che a varessin podût jessi tal gno puest.

O cjamini par strade e mi sint intor i voi di ducj, massime chei dai poliziots. Chei che o intopi par strade no san cui che o soi ma al è come se mi usmassin. Al è come se o ves une biele scrite “condanât” stampade intor.

No ai copât nissun. O ai brusât une machine doprade par sbusâ la mont. Par une opare che no coventave, ma che e varès ingrassât un biel trop di professioniscj, politics e mafiôs. Chel istès a son leçs di pueste par chei come me e cussì mi soi fat vincj agns par terrorisim. Cinc in isolament totâl. Come se o ves sassinât oms, feminis e fruts... Invezit o ai dome brusât un machinari e fermât un cantîr. O ai fat la robe piês che o varès podût fâur. Ur ai fat pierdi

milions di euros.

La preson mi è jentrade dentri. Me puarti daûr pardut. Ancje achì, su la piche di cheste mont. Di chi il cîl al somee cussì vicin. Di chi si viôt la valade interie, ancje la feride vierte dal cantîr. O capìs alore che il condanât vêr no soi jo. O respiri a plene bocje, o cjapi la corse e o salti. Dibot o deventi cîl e aiar, bosc e cret. Par simpri part di cheste mont là che agns indaûr o ai lotât.

di Carli Pup
(conte vincitore dal Contecurte Day 2017)